


雜著
講義

少華稿
十四

共十五

EAST ASIAN LIBRARY
KOREAN COLLECTION
COLUMBIA UNIVERSITY
NEW YORK, N. Y. 10027





RAFT
Good
CHIP
2.30
V.14

T
3651
N15
✓.14

雷淵集卷之二十七目錄

雜著

原命一

原命二

原教

周平王論

論廟制

蘭說

猫說

二多齋說

贈公弼

扶風子傳

孝子朴氏傳

金鳴國傳

金聖基傳

林俊元傳

尹孝子傳

屈乘傳

毛穎傳補

讀張耳傳

讀陽明集

諭癰神文

英陽偽系辨疑文

廣象戲志

擇齋箴

酒箴

躑躅杖銘

酒壺銘

太華古硯銘

演和尚畫室銘

幽蘭子詩囊銘

河圖書笙銘

吳敬父古硯磬銘

徐步軒銘

衮衣銘

東宮冊封賀箋

正朝賀箋

大殿誕日賀箋

進東宮進德八箴

致仕謝箋

面賜手書御詩謝箋

自題畫像贊

俞文翼公畫像贊

涵月大師法相贊

雷淵集卷之二十七

雜著

原命一

聖賢之命制乎天中人之命制乎人下愚之命制乎物聖賢者順天而動先天而天不違後天而奉天時其語默動靜皆有以格乎天故傳曰大德者必得其位必得其壽必得其財其語默動靜一有不合乎天天必知之故孔子曰予所否者天厭之天厭之又曰丘之禱久矣豈非聖賢之命制乎天者歟中人者所行不能一循乎天善始而不善終者有之焉得於此

而失於彼者有之焉各因其所遇之幸不幸而窮達榮辱生焉豈非中人之命制乎人者歟下愚者所行一反乎天仁義之存諸中者幾希而一有所利則忘其君與親君親性也而猶且忘之豈非下愚之命制乎物者歟故制乎天者人不能貴賤之可行則行未始達也可止則止未始窮也惟天之是循已制乎人者人用之則行舍之則止惟人之是循已制乎物者義不可取而取義不可進而進惟物之是循已故制乎天者其榮辱死生皆正命也制乎人者其榮辱死生有正命焉有不得正命焉制乎物者其榮辱死生

皆非正命也故曰唯聖賢可以責命于天中人以下而責命于天妄也下愚而責命于天罪也

原命二

天之命乎人者有三焉曰性曰數曰名性所以善其始也數所以成其中也名所以定其終也故性無不善數有窮通名有善惡其為踴躍殊皆謂之命人皆知吾之性天之性也人皆知吾之氣天之氣也天之氣有昏明天之性仁而已矣故曰性無不善天之道一陰而一陽陰陽之運一否而一泰天之不得已也故雖天不能為人謀君子而當乎泰則吉小人則凶

其生之適會是運命也故曰數有窮通雖然人徒見君子之凶小人之吉謂之無天殊不知君子小人各隨其善惡而得其名後世未嘗無桓魋臧倉也不能掩仲尼孟子之聖後世未嘗無華歆賈充也不能掩曹操司馬昭之惡其他君子小人莫不隨其行之大小而得名焉各稱其分焉故曰名有善惡仲尼孟子之厄窮於當世不過數十年而其賢聖之名於後世者窮天地而無已時曹操司馬昭之得志於中國不過數十年而其惡之名於後世者亦窮天地而無已時於是乎見天命之大定矣故君子明其始安其中

以俟其終而已矣

原教

教之原出乎性明乎性然後可以言教夫人皆知虎狼之不可為麒麟則荀子之言性惡不可與言教矣人皆知鳳凰之仁不能化鷙鳥之暴則揚氏之言善惡混不可使為教矣天之生人欲其序而不亂也欲其和而不乖也則將必與之以序之和之之具必不與之以乖亂不可理之性而強之以序且和也火之族皆燥水之族皆濕虎狼鷙鳥之族皆暴麒麟鳳凰之族皆仁何獨於人之族而疑其性之皆善乎傳曰

天生烝民作之君作之師惟億兆人之性猶一人之性也故使一人統億兆人而治之不然而人各其性將謂子弑父臣弑君亦人之一性而卒無以教之歟然則堯舜何以為君孔子何以為師且如荀子之言安得堯舜孔子而為之君師乎假使堯舜孔子而治之歟將執而戮之乎抑教而化之乎欲執而戮之乎如荀子之言舉天下無人矣如揚子之言舉天下之半而戮之人之生滿多而其誅無已時矣何暇於為教欲教而化之乎彼惡者非有物蔽之也性也性之不可易教將安所施乎余故曰教之原出乎性明乎

性然後可以言教不明乎性而言教教之賊也夫教者以吾之不蔽覺彼之所蔽而已覺則善故知人之性與吾同也知人之性與吾同故堯舜不下堂而治天下聖人之教若是而已矣

周平王論

天下之亂未嘗不起於上而成於下天下之論未嘗不明於著而昧於微余讀春秋二百四十二年之中弑君三十六至於子頹奔衛有遷王之禍叔帶召戎有伐周之師而天下遂無周矣論者徒知頹帶之惡而已夫孰知惠襄之亂漸於幽王之弑也徒知犬戎

之弑王而已又孰知平王之與聞乎故也請言之今
有不得於其父而託於人者彼將驅猛獸往噬其父
則其子以死爭不獲焉趨而救父同日而死可也此
人之所受于天而不待強勉而為者也受之于天者
何君臣父子之義是也為人君父者一日無是則必
受篡弑之禍為人臣子者一日無是則必受亂賊之
誅故先王之刑莫嚴於弑君父而春秋之法亂臣賊
子必先治其黨與蓋謂不如是無以剪其羽翼而亂
臣賊子接跡於天下矣今平王不受命而奔諸侯坐
視其父之弑而莫之救其父已死乃返其國厭然服

其父之冕居其父之宮南面而臨天下天下之人可
勝欺哉趙穿弑靈公趙盾未出山而復董狐以為趙
盾弑君而夫子修春秋因舊文而不變焉吾不知幽
王之弑也將歸惡於誰乎將以申侯為首惡而平王
為之黨與乎將以平王為首惡而申侯為之黨與乎
春秋之法諸侯弑死而賊未討不書葬責其臣子之
辭也桓公之世王不稱天責天子之不能討賊也知
此義則春秋之所以處平王者可以推之矣嗚呼彼
亂臣賊子之無憚於天下而猶不敢肆者徒以有先
王之法也今平王位則先王之所履而行則先王之

所討也彼將惡乎畏哉此又惡乎禁哉於是諸侯為
亂賊而天子不能討諸侯之大夫為亂賊而諸侯不
能討今年齊弑一君明年衛弑一君卒至於王室之
亂而陵夷及於亡此春秋之所為作也故曰春秋二
百四十二年之禍皆始於平王而平王自為之也或
曰使平王立而討申侯滅之可以免乎曰然向令盾
也討穿也而誅之弑君在穿而討賊在盾矣使平王
雖不能死難於初舉一旅之師而問罪於申庶可以
免於惡而救後世之禍矣今也不然德其立已而發
民而為之戍以遏天下復讎之師平王之惡至此而

不可赦矣吾不敢以文武之後而諱之也

論 廟制

國朝廟制但以世次奉安不拘東西昭穆之制 永
寧殿則 四祖居中而西夾 定文端德東夾 睿
仁明元亦用世次不序昭穆而兩殿皆同堂異室以
西為上按退溪年譜 世宗倣漢原廟之制立 文
昭殿以奉四親及 太祖藏主於後寢同堂異室以
西為上四時有事則祫享於前殿 太祖居中南向
高曾祖彌列於東西畧如古昭穆之制退溪 廟圖
亦曰 文昭殿之制後寢五間以奉高曾祖考與

太祖五位神主前殿三間大祭則祫享于此 太祖
居北南向昭二位在東西向穆二位在西東向而其
間有兄弟繼立則同昭穆共一位之法見於五禮儀
宗廟圖說然不可以同一室故當依賀循七室加一
之議蓋言同位而異坐也如 仁宗 明宗同昭穆
也 仁宗之薨大臣李邕尹元衡等議 仁宗祔則
世祖當祔而於 明宗親未盡不祔則過五室非
世宗之制於是祔 仁宗於延恩成宗追崇德宗以睿宗已祔
文昭祔德宗于別殿而號其殿曰延恩及 明宗薨大臣李浚慶等獻
議請以 明宗祔廟時並 仁宗入奉 文昭而位

數自至於加一為六以此考之 宣廟以前 廟制

尚用昭穆明矣又 廟圖云 世祖於今 謂宣廟 當祧

則亦可見 宣廟以前曾無世室之制矣若其時已

有世室之制則以 世祖之功烈必不為當祧之位

矣蓋 國朝古章如此而後世世室之位非止一二

則五室之禮已不可行而昭穆之制又從而拘掣不

若以世次奉安之為便順故始有今謬矣可勝嘆哉

嘗考 四祖謚踊各四字而今 神版所題則曰

穆王曰 翼王曰 度王曰 桓王而已 妃位亦

書謚號中一字曰 孝妃貞妃敬妃懿妃而已 國

初典禮之簡質無華臣不勝稽首抃頌矣

蘭說

舍南敗垣之陰有蘭茁焉土崩者擁之草蔓者緣焉過者罔有知為蘭主人教童子去蔓疏崩壇以崇之貴之也客有笑于傍曰子之貴蘭適以害之也夫是蘭也惟崩中乎生蔓側於長幽獨掩晦是以茂也今子欲夷厥由生芟厥由長章厥由晦貴之所在名必隨之將有名之者曰茲瑞草也香草也手就而摩鼻就而嗅罔以遂厥性豈蘭之幸哉主人曰雖然為茲異草也猶閼鬱于茲卒莫見竒斯又其幸歟客又笑

曰奚患夫是夫惟處幽也久殆將顯風滋雨潤根鞏而葉強方秋霜露既降百卉枯死子之庭有嫩然青者方冬霰雪既集衆氣閉蟄子之室有黯然香者雖欲其不見奇得乎我凡物幽若顯在時子胡汲汲焉於是主人顧客大噉麾童子曰止夫子之言殆達者也

猫說

余家苦鼠暴有一大鼠尤恣拱兩穴以據窘乎東則趨西迫於西則趨東其行大捷視之弗暇而况可執之乎家人甚病之土室兩穴又乞諸隣子猫以恐之

私計鼠暴當不復慮朝而視則又穿兩穴竅然如初
矣猫且飽而嬉弗以鼠為意然猶日夜居衣房中不
妄出鼠始畏約從穴中窺俟猫去為暴猫終不去屏
跡不敢出者數日既而窺之益熟覺無他異以為彼
真無為也遂稍出穴公行猫亦不省也居數旬鼠從
東穴出入衣簾中猫睨以視亟起趨東穴大出聲以
吼則復走西穴據之鼠乃大驚意東穴有變緣簾底
徑投西穴則猫已鼓吻迎之矣鼠氣奪不能旋小動
輒見防攝之屏息計卒無可奈何然甚肥健猫力不
敵積威以逼之及其甚而後噉焉余始而不怡者久

之旣而歎曰彼固自取之也夫依人而生者不毀人
之室因人以食者不攘人之財且物之害人者亦或
利人今鼠依人之室而穴其壁食人之粟而又損人
之衣竊竊苟苟以至微之命屢憎於人樂蹈危機而
不知變焉是宜殄滅其種類蕩覆其巢穴罔俾孑遺
又烏足閔乎嘗讀唐志至蕭淑妃臨死罵武氏曰他
生我為猫阿武為鼠生生扼其喉每想其冤毒憤罵
之狀未嘗不為之於邑竊悲其意也今見猫捉鼠輒
思其言惟恐猫之不猛而鼠之走脫用為嬉笑此又
一快也夫一事也而可使好利者戒嗜殺者懼烏可

以不識

二多齋說

贈公弼

古之用文章妙天下者未始不勤而求之求之勤故其得之也深得之深故其言之也切六一氏博而後約者也故語其多老泉氏積而後發者也故語其久昌黎氏主乎理故其思也專柳州氏急於詞故其擇也精此數公者其言皆是以為後世學文者法昔者孫莘老問諸歐陽公曰為文章如之何歐陽公曰第多讀書請益曰第多著文世常患讀書少又不多著文故不工如其多也鮮有不至者蓋公以所嘗自試

者告人故其言有味然學者或不深惟先後之序以
須遲久之功而惟多是務則其病也膚故當以老蘇
之法參之其稱曰予年二十七而猶不知書旣而發
憤取論語孟子閉戶端坐而讀之絕筆不為文辭者
五六年乃大究六經百家之說以考質古今治亂成
敗聖賢窮達出處之際涵畜充溢抑而不發胸中之
文日益多沛然終不可禦然後則愾然曰可矣下筆
頃刻數千言縱橫上下出入馳驟而必造乎深微而
止此可謂知所先後而能遲久矣向令老蘇朝而讀
一編書夕而著一篇文夸多而已則何能做出許多

文章如此其好也雖然學者或徒以汎博為能而不務窮其理徒以贍敏為事而不務修其辭則其弊也粗故必也思之專如韓子擇之精如柳子則庶幾矣韓子之書曰始吾非三代兩漢之書不敢觀非聖人之志不敢存處若忘行若遺儼乎其若思茫乎其若迷如是者有年然後識古書之正偽與雖正而不至焉者乃徐有得也故曰記事者必提其要纂言者必鉤其玄此韓子讀書之法而其思之專也如此柳子之言曰吾每為文章未嘗敢以輕心掉之懼其剽而不留也未嘗敢以怠心易之懼其弛而不嚴也未嘗

敢以昏氣出之懼其昧沒而雜也未嘗敢以矜氣作
之懼其偃蹇而驕也抑之欲其奧揚之欲其明疏之
欲其通廉之欲其節激而發之欲其清固而存之欲
其重此吾所以羽翼夫道也此柳子著文之術而其
擇之精也如此故為文章始於多畜於久凝於思成
於擇而大法備矣諺曰不耕胡穫不學胡得辟之田
讀書猶耕而種者也發而為文者猶百穀之生焉者
也上農廣其疇壟力墾而深耕之然後收其實倍蓰
焉然相地之高下列其畝視土之豐瘠宜其種知水
之泄瀉均其溉及其生也鋤其莠之亂苗者然後穀

乃美焉故天下之理一也知此則喻彼從子公弼志
古者也與其友二三人相為謀治其燕居之東偏群
居而讀書焉請名於余曰必以義俾有勸焉余嘉其
志因以歐陽公之說命其堂曰二多又舉三子之言
申其意勉之哉若乃進乎是者有夫子之文章可得
以聞焉余姑不敢道以俟其自得之云爾

扶風子傳

扶風子者宜寧氏之宗老也其祖錫於余六世祖為
子屬莫尊也其人敦於孝八十而慕行莫高也老也
屬尊也行高也故宗人咸敬之扶風子雖少孤不學

為人誠長者由心而行縮則從之歎則違之故鮮有
敗行其言呐呐焉發之難然發必可聽也扶風子居
於湖中湖中人重其孝具狀申觀察使謀以表其閭
使者既發扶風子聞之驚曰焉有以孝表其門而敢
自安者是逐我也使人追諸道乃已宜陽子曰孔子
稱人之生也直余於扶風子信之矣扶風子出言為
行不考於古維心之所安而率入於善嘗讀檀弓記
至曾子易簣扶風子請其義則犁然以喜既而曰曾
子其未聖乎季氏之簣何為至死而乃易也是亦度
乎心而獲而已扶風子蓋未嘗讀書也

孝子朴氏傳

孝子朴氏者名文娘星州人父壽河世祖時政丞
元亨之後中世微淪於嶺之南前縣監朴某者家貲
累千居達城以豪聞與壽河爭山訟于營門觀察使
令星州牧查報壽河素剛狠疑觀察使與朴監有私
大罵方伯不平心聽訟受姦囑公奪人墓地觀察使
聞大怒竟掠殺之也父既死惟一子尚幼有女二人
其長實文娘父既死文娘日夜抱父屍以哭不食將
死既而奮曰殺吾父者猶在而吾弟未壯吾死將以
殺父之仇遺吾弱弟乎吾弟未壯吾死當誰殺仇於

是悉召奴婢十餘人文娘哭且謂曰此吾死之日而
冑從我乎皆哭而應曰諾於是悉聚家中鉏鋤田器
以與奴婢為兵文娘執大斧仰天一呼而出奴婢皆
從無敢後者遂走上山斫朴監父塚兵折以手掘指
盡落於是諸受兵者皆刺發其柩而燬之守墓者戰
恐不敢爭犇告朴監朴監立點蒼頭為軍圍山執文
娘磔殺之於是嶺南人或右朴監或悲文娘之死右
朴監者曰文娘不告官擅發人父塚是宜死右文娘
者曰文娘急於復讎焉知官其以擅為罪也文娘為
罪朴監亦擅殺當死事聞下本州查驗是時星州

牧某人按其獄右朴監焉文娘已死其娣曾娘曰吾父以冤死吾兄為吾父死吾獨生何為西入洛擊登聞鼓被髮韜面自訟父兄冤狀辭氣悲壯事下該曹又命吏按覈已而事不竟其弟年十餘會星州牧按父獄者已罷去新太守至官兒聞星州牧過其閭手磨所佩刀甚銳伏林中候其至則抽刀擲之馬上穿其鞞太守大驚索得兒問而何故欲刺我兒乃勃然罵曰女按獄不平使父冤不伸是與殺吾父同也吾欲報仇耳於是太守乃大驚撫兒顛曰若所仇者前牧也我非若仇也歎息而去

宜陽子曰二朴之獄余不知孰為直也擅夷墓擅殺
人交相賊蔑國憲皆可惡也然余悲夫文娘志存報
仇殺身不顧凜凜有古烈士風二弟亦相次踵其事
立意皦然又懼夫世無重義者而恒奪於是非之口
為立傳以遺後之君子

金鳴國傳

金鳴國者畫者也其畫不師古而專於心得 仁祖
時 內降黃綃梳貼 命鳴國繪之十日而後進固
不畫也 仁祖怒欲治之鳴國曰臣固畫也他日自
知之他日公主晨梳有二虱緣髮末爪之故不死熟

視之乃畫也於是鳴國之畫聞於四方然性疎放善諧笑嗜酒能一飲數斗求其畫者必多置酒挾其量然後乃肯畫不大醉不畫故其畫多奇氣嶺南僧用布五十匹賄鳴國乞為地獄圖鳴國大喜悉以布送酒媼曰恣我取飲毋言無也旣而僧來索圖鳴國罵曰女姑去吾未得其意意得乃畫如是者三乃痛飲大醉裸衣聳躍急握筆臨絹畫一鬼王氣颯颯驚人僧固大喜旣而畫刀灼鼎鑊一切刑具前跪數百刑徒纍然皆髡首沙彌矣僧大愕麾之曰噫噫公欲殺我鳴國箕踞罵曰地獄無則已如有非若徒之入而

誰入也又笑曰第益市酒來吾終不敗乃事僧固無可奈何亟市酒至鳴國乃引湍流獸已用秃筆一掃髡者鬢鬢皆髮矣又大噓曰此可以足女事乎又引湍自若今其畫尚在衆僧傳摹以為寶鳴國死其徒多以畫間然皆不得其神云

宜陽子曰余嘗於人家見鳴國所畫驚嶺浙江極雄肆嗚呼鳴國不死即其畫而鳴國在焉

金聖基傳

金聖基者始為尚方弓人既而棄弓從人學琴以琴名又善洞簫琵琶能自為新聲教坊子弟往往學其

譜擅名者衆然率皆出聖基下於是聖基旣負其絕
藝耻為妻子生產人有以賄交者不苟取家日益貧
買小舟西湖上手一竿往來釣魚遂自號釣隱遇江
靜月明搖櫓中流引洞簫三四弄聲甚悲壯江上鴈
鷺飛鳴磔磔蘆葦間隣舟聞者皆起立彷徨不能去
當是時胥人虎龍上變書旣大殺舊臣漸以搖東
宮不果然顧以勲封東城君自公卿以下不敢忤東
城君指虎龍與其徒飲酒具駿馬從徒往請聖基曰
今日飲非子無以為懽願子少顧我聖基辭以疾不
往使者至數輩固請聖基固不往虎龍慙其徒脅之

曰不來吾且大困汝聖基方與客鼓琵琶起奮髯擲
琵琶使者前曰為我語虎龍吾七十何以女為懼女
善告變其往告我我一死何加虎龍聞色沮為之罷
宴自是聖基不入城好事者或載酒之江上輒用洞
簫為樂亦數弄而止其後二年而虎龍誅

宜陽子曰高漸離舉筑而秦政折其驕雷海清投樂
器而祿山沮其氣金聖基擲琵琶而虎龍亡其膽三
子者皆賤工也君子不齒然及其義有所激卒以其
技成其名迺磊磊如此高雷事史記綱目皆特書至
今照人耳目獨不知國史能書聖基事否姑立傳以

俟

林俊元傳

林俊元者京師北里豪也京師有南北部其南部多
商賈富人其俗好利纖於財以侈靡相高其北部皆
貧戶游食之民然徃徃意氣任俠相然諾好施與詩
人酒徒時節相追逐風流可觀豈亦風氣使然歟俊
元始家貧有老母為內司掾以勤幹得任事司中累
年家貲累千廼歎曰於吾足矣即棄去日與其徒高
會飲酒時甚者庾續洪詩人洪世泰有聲閭巷中然
庾嗜酒一飲數斗世泰母老而貧俊元則館庾為置

美酒而數以財周世泰俊元既饒於財為人多奇氣
好義親戚故人有吉凶事貧不能舉必以俊元為歸
養於家如子弟此者常數十人俊元嘗閒步街上有
一女子從一少年行且哭聲甚哀問之女之夫死逋
少年金三十兩故執女告官去也俊元歎曰安有以
三十金故而辱女子至此歟顧謂其僕曰亟之家取
三十金來至則悉以與少年取券裂之迺去女隨以
涇固請姓名俊元固不言於是俊元名動士大夫間
俊元少學詩于龜谷崔奇男其後俊元從使者入燕
戒家人曰公老矣即死必為我致良材為棺奇男死

貧無棺吊客歎曰嗟乎使林子昭在者豈使公死而無棺言未已有輿木來者詢之子昭人也客迺大驚及俊元死吊者皆悲如哭同室之人其族婦女之帷而哭者皆曰吾胡恃以生則俊元之賢可知已

贊曰今人恒喜言世無好人若俊元者可謂好人者非耶余因此而竊悲間巷之人雖有善行而臨卑而地寒率不能自章也鄭來僑北鄙人能屬文多與間巷人通余因以得聖基俊元事次以為傳語曰義之弗圖俾君子急余敢不勉焉

尹孝子傳

尹明相坡平人生有至性其事父母能盡其身其為
兒時父嘗欲笞之會天寒明相尚簍於爐然後敢進
及其既長而致愛於父母者多推此類而充之故其
為孝能無憾於終始云其後母乳而死明相亦一子
方乳明相使其妻乳弟使老婢乳其子其後弟率得
全而其子絕乳至死其妻亦不敢有言余家與明相
隣幼時過其間必聞其哭泣甚哀路人或歎息而言
曰此尹孝子之聲也然明相猶介執一不能容物見
人之不義輒奮口面詈之乃已不少忍人多忌惡之
然至其孝雖惡之者亦不能掩云其妻之所乳者弟

曰明著亦有行明相率無子死而明著取其子以續兄之祀自取宗人子為後以報其德云

宜陽子曰明相同時有金玄澤遠卿亦以至孝聞居母喪過毀死其為人清介見義必行頗類明相而顧篤於禮家居斤斤淳質綽然有長者風吾伯氏平生慎交游惟遠卿為得意常言世俗不知禮故疑遠卿隘然遠卿實不隘謹於禮而已

屈乘傳

乘之先春秋時為晉獻公質虞假道滅獮

晉獻公以屈產之乘

倣道於虞

有功封於屈為屈氏凡戎事屈氏世為驂乘及

惠公逆秦師舍屈氏而用鄭馬

四秦繆公伐晉惠公逆之乘小駟鄭入也

秦獲惠公語在左氏傳晉衰屈氏之族散天下或之

燕或之宛或居冀之北野或散于汧渭之間

非子為周孝王

養馬汧渭之間

乘北產也其毋嘗休于柳下有龍風于澤十

二月而生云乘長八尺餘

凡馬八尺以上為龍

多力有氣敢往

然無以自食自鬻於商人商人未知其奇也而利其

力常行於市使負鹽車以先

賈誼賦驥垂兩耳服鹽車兮

乘嘗一

日盡粟一石

韓文馬之能千里者一日或盡粟一石

乃以棧豆惡草具

食之於是乘既困厄不足以盡其才者夜亡走澤間

會代之消人使於楚遇而奇之束帛以贖之

田子方見老馬

棄於道東
并贖之

歸言于君曰臣稱其德不稱其力

論語驥稱其德

不稱其力

於是君召試殿前見其體甚瘦心憐之然不之

奇也使充羽林騎久之君畋于鴈澤乘以其徒出步

驟合圍不失其馳所獲獨多君乃大悅以為司馬左

右皆賀獨司農羊華

韓文有下邳侯羊華傳牛也

不悅會狼居部

落有熊氏殺中山侯塞叔以作亂君欲令司馬擊之

羊華仍言司馬外強中乾及懼而變必敗

左氏傳慶鄭諫晉惠

語昔臣之先從田單破燕軍復齊城七十二臣亦知

聞矣君盍用臣君笑曰戎事非爾所知也君執龜卜

之遇楚王田于雲夢之兆曰即鹿无虞獲其雄狐火

中成軍有熊其奔吉唐午司馬從伏波將軍大戰于

房陵見有熊軍仰面而笑時天寒大風以虎賁三百

縱火燒山司馬蒙臯此以先犯

左氏傳胥臣蒙馬以臯此

有熊軍

燒殺死者過半有熊氏大窮使令狐氏夜詐為美婦

人狀以見君侯將韓盧逐殺之也司馬乘勝大獲而

歸獻俘于君所君與之繁纓加驃騎將軍大宴宮中

司馬啣杯前為壽

唐玄宗教馬舍杯為壽謂之傾杯樂

左右皆樂司農

革華自以服田躬耕老盡其力彼以獵狗之功反居

己右於是怒甚口正沫出驃騎亦怒君麾之以肱曰

止飛騰戰伐決勝千里驃騎有焉給餉餽不絕糧道

華有焉封華下邳侯賜驃騎沙苑四十里為食邑

唐有

沙苑牧馬杜詩沙苑行緣以周墻四十里

屈氏之族見驃騎橫甚或別族

為盧氏累氏而驃騎日益驕從一騎日出擊黠鬼馳

驚未稼之地民多號呼怨詈君乃至沙苑從容謂曰

周武王克商歸于華山者

武成歸馬于華山之陽

非若祖乎遂

改封華山驃騎始懼汗出浹背於是驃騎日益恐請

歸死于華山會有翰如者

詩白馬翰如

新得幸於君君歌

之曰翰如來兮從西極歷萬里兮懷有德承威靈兮

降四國布武力兮天下服而驃騎已老矣遂許其歸

不知所終或言入西域諸國學道為仙云

太史公曰始棄以倣儻

天馬歌志倣儻方精權奇

不羈之才受辱

於奴隸人之手

韓雜說雖有名馬抵辱於奴隸人之手併死于槽櫪之間

豈嘗知

一朝遇知己者而遂橫行萬里得志於天下若此之

壯也謗稱良玉不遂埋於泥沙文木不空朽於山林

非虛語也少盡其力而老棄之

田子方遇老馬歎曰少盡其力而老棄之

仁者不為也

君真少恩哉余悲夫改封而知懼翰如進而

能行也為立傳

毛穎傳補

傳毛穎本以文滑稽耳然與穎遊者楮先生

陶泓陳玄功不在穎下而昌黎不為立傳今

為補缺如左云

陳玄者與伯夷同祖後徙陳為陳氏陳為楚惠王所滅而陳氏逃之南蠻十餘世而及玄又徙絳復為中國人然猶從其故俗而文身焉玄喜為墨翟之道常自誦曰如有用我而利天下者雖磨踵放頂吾亦為之秦皇帝初并天下稍近文學之士而玄代李斯為客卿與陶泓毛穎常居左右以潤色辭令上甚珍之既而燕人盧生以惡語誹訕上仍亡去上發怒遂按作籙圖書者而穎玄之徒多與其謀於是坑儒生二百餘人而玄等廢不用

陶泓者其上世從虞舜于河濱舜為天子賜姓為陶氏為人質厚內有城府穎玄雖貴幸上將有任使或掙抑而致之莫不犇走顛倒少弗稱旨輒遭斥退至於泓獨見器重有文事上使穎等躬詣泓謀泓嘗卧而應之不為屈上既合諸侯詔泓等同館以居專治天下簿書三人益相狎泓肥鈍卧輒坦腹玄常以足加其腹泓亦弗嫌也穎玄皆早歿泓以壽終于家後有人為之銘曰弗能銳仍以鈍為體弗能動仍以靜為用維其然是以能永年

褚先生者其先為周景王太史紀周史有功封于剡

其子孫遂為會稽人戰國時褚氏散而之諸侯然會稽之褚最顯云始皇帝九年先生從楚使者入貢于秦始皇見其白皙美容儀甚憐之使為太史嗣其職時天下多事上令中書君詣先生同記注中書君攘首奮舌俯仰縱橫上下累千萬言窮日夜弗倦而先生精白以承無不稱上意者既而上用丞相李斯議焚詩書百家之語李斯曰褚氏之族以家故史氏多記異書必盡滅褚氏天下之書不期絕而自絕上可其奏遂並焚褚氏之族于咸陽市上而先生以方錄秦史且能知卜筮方術及天下輿地錢穀所簿故獨

不與焉及沛公入關蕭何先收圖籍而先生隨以往
佐漢定天下竟以壽終初楮氏之族有名通者以善
興利見寵於秦皇帝行視天下錢帛財寶之處趨時
貴賤以通販鬻訾先生以腹貯萬卷而不能達時務
焚書之禍通以楮氏而不知書顧益幸漢興以通輕
薄不能禁盜廢之終不復用而孝文時稍求亡書諸
楮氏逃禍于四方者稍因諸儒抱遺書以自見其子
孫至于今不絕

贊曰偉乎博哉四人之功蓋與造化參矣微四人聖
人無以垂其教有國家者無以宣其化圖書之臨黼

雷海集
黻之章泯然無可徵而天之理塞矣嗚虜微四入吾
誰與歸

讀張耳傳

宜陽子讀張耳傳至賈高事未嘗不廢書而歎也賈
高不勝一朝之狠卒令其君喪國罪之首也然求其
心亦忠之過耳烏可深誅高祖英主也心憐其忠而
欲赦之以勸天下故使泄公持節往問復與前因告
張王已出狀然後赦高高於是可以無死矣而卒絕
吭死太史公良史也喜高祖之能赦高而高之遂死
也故叙其事本末甚悉而又稱當是時賈高名聞天

下此豈腐儒俗子所可窺哉晉時辛賓庾珉忠而正

者也後世無貶焉

晉懷愍被虜時二臣死之

試使高生其時見其

君俘於夷虜其發憤據忠謂有異於辛與庾也乎且
使高生乎七國謀叛之日高為吳楚之相其從之者
乎謂將諫而死乎千載之下循其跡而求其心底幾
得之矣嗚呼使高生乎東國城下之辱也三臣不足
四矣

讀陽明集

古之人以孟子為大儒孟子亞聖也而曰大儒可乎
以孟子而謂之大儒則是大儒者非孟子不能當也

古人立言之謹嚴類如此王陽明門人王畿贊其師
曰萬物皆備於我而自是千聖不離于心而可馴是
不幾於大聖乎立言如此烏之以信於後也不若鄒
守益之贊曰良知一振群寐咸醒二句之差得其實
也

諭癘神文

龍人好神凡有疾病愁苦悉諉之鬼一切以
禳禱為事夏秋之交人病疫癘其候例寒熱
巫則曰寒者鬼索衣也熱者鬼求飲也於是
設酒食施衣服伐鼓考缶以說神他日病自

若則曰神猶不足也事之加豐焉病久且已
則曰神福之也又盛為具以謝神昏惑瑣細
不可理曉今將謂瘡無神衆則大笑駭以為
彼誣神謂禳禱無益衆必大恐懼以為彼慢
神二者皆不足以開其惑不如姑順其勢陽
為瘡實有神而聽吾言者吾為文以諭神且
責之使無為暴焉

古者聖人明乎事神之意列百神之位而皇天后土
社稷歲瀆暨名山大川為一國望者罔不致祀宗廟
之祀自天子達于庶人又有以盛德紀以功紀以死

事紀者於是神定位人正事犧牲酒醴舉羞以時人
若神不相侵瀆諸侯不得郊時宗廟之位自諸侯殺
自大夫非廟紀不得事神禮之經也如有以士庶人
而非廟紀而得事神者是悖禮反經之尤者也悖禮
不祥反經為亂神將不享怒而降其罰不然是喜人
為亂而助為不祥者也必非所謂明神列乎聖人之
紀者也天且憎疾大降其罰人若神胥不安且皇天
后土社稷歲瀆暨名山大川為一國望而受天子諸
侯之紀者諸侯非封內山川不得祀其神至尊且貴必不冒自貶
其威重下食於編民以功德死事紀者其神賢而庶

必不冒棄其肥腴馨香之薦而侵虐無辜以歛其財
賄也凡百宗廟之神亦各有子姓之明裡焉必不歆
非其類然則夫瘡神者果何神也其非所謂明神列
乎聖人之祀者則審矣且自王公貴人以至婦人孺
子莫不敬神而畏之者為其能聽命于天而禍福人
也夫橫肆其威毒愁苦人父子兄弟俾不安其生豈
天之命邪神而弗用命顧淫饗于聲樂飲食迷惑而
不知改是神自獲戾于天也其靈必且弗長又孰敬
而畏之者哉且神之所威福者果何人哉仁者安命
不語神智者知命不惑神惟不仁不智者好神然則

神之所威福者弗過昏愚無知小人之造而已其何
以為神為神計莫如棄其舊惡威福一聽于天使為
善者勸而為惡者沮則天之理愈著而神之道罔愆
下民敬畏光靈永被孰若得罪于天見絕于君子為
百神之羞哉

英陽偽系辨疑文

我南氏英毅公以下密直公以上譜系散逸後裔之
私立文字證訛補缺者不勝其繁而互相逕庭莫可
歸正故前後修譜時先輩名公只用傳疑闕疑之法
五百年間系牒所傳廬存六世其他顛錯誕妄尤不

可稽者僅闕而不書此蓋出於慎重深遠之圖而諸
家碑狀之敘述系派亦皆考信於斯無或有貳言者
已至幾百年之久矣今者英陽宗人私作一譜自英
毅以下子子相承無一代闕遺字諱官銜年壽月日
一一備載以至配位先系生卒產育歷歷記識無異
近代之籍耳目所及者誠可異也第未知此錄始成
於何年傳錄於誰手而果有貞珉之刻石室之藏可
以徵信於萬世者歟試以卷末小跋觀之但言一宗
人得於宗人斗彩家而編帙陳古字畫昏黝云則何
年所成誰手所錄皆無可據而非出於金石剞劂之

傳亦明矣且斗彩既有此錄則其為奇聞異蹟不啻如密直先墓紫石金環之此毋論諸宗之信不信在渠之道固宜汲汲闡揚之不暇而顧反虛徐遲回不出於三度修譜之日秘藏於箱篋蠹魚之藝及今新譜既成之後始乃不謀於遠近諸宗暗地登梓有若故為起鬧者然抑何故歟嗚呼自英宜分贄之後圖牒具存子孫世守著見於前後名賢文集者尤為昭然則今此宗人不信屢百年傳信之文歸一之論而必欲借重於鄉宗一片古紙先統序次恣意變幻刊出杜撰之書輕犯繆妄之罪者亦獨何心哉況其所

錄中紀年紀事攷諸綱目叅以東史逐節純繆隨處
破綻以此而行于世雖三尺童子必無見欺之理多
見其不思也雖然一切諉之以謬妄不有以明辨之
久遠之後不無昧者滿惑之慮故吾宗相與謀旣已
逐段辨正又各記述文字以示後人庶幾不惑於無
稽之說而同歸於誣先傷倫之科則吾宗之幸已

廣象戲志

廣象戲者本乎谿谷所志象戲者而廣之也其為局
也經十五道緯十四道合二百有十步其布陣也各
據南北九十步為三軍焉中軍四十五步其二十一

步為內營經七緯三而少北又畫其中九步為九宮
斜道而濊之中元帥位焉士二謀士也居元帥之後
而左右焉象二威遠者也居士之左右車二擣虛者
也居象之左右砲二衝堅者也列于九宮之兩角焉
馬二執銳者也居象之前間一步焉環內營而二十
四步為外營前鋒一前茅也居南後將一斷後也居
北竒二竒門也一東而一西東南西南置二游焉游
擊也東北西北設二伏焉埋伏也虛前鋒之前一步
為營門步與騎相間三三為隊列于門之左右以竟
東西騎者騎兵也步者步卒也各六左右軍各十五

步畫其中九步為九宮斜道而濊之中將之位也士
一居將之後車與象各一居士之左右馬與砲各一
居九宮之角而東西馬右營車右而馬西其行師也
元帥行九宮之中無拘然不出九宮也左右將如元
帥中軍有急援之不自出前鋒外而不內然行於外
也無拘後將內而不外然行於內也無拘士行如將
車行縱橫前却無拘也砲行必有乘也惟砲與砲不
相乘亦不相食馬行一日象行三日然馬有麗于肩
象有麗于肩若腹皆不得行騎行半日步行一步騎
與步可左右不可却也將行二日有麗于心不行伏

之動日半不殺不發有殺復于伏竒行方貫穿諸宮
無拘然不出三道也獲其元帥者勝不能相勝者平
此其大勢也左右將陷盡俘其屬之在營者有能復
讎者存之兩陣既成前鋒出兵未交前鋒不相殺此
又師律之一端也若夫竒正合變之妙存乎其人

擇齋箴

余有燕居之所名之曰擇齋又作四箴一曰
擇言二曰擇術三曰擇友四曰擇地上可以
正心遂性下可以全生遠害有補於己莫切
乎四者然行此四者之要在精察而固執擇

之又擇蘄至乎無擇焉可苟焉而已哉辛丑
陽月甲子書于齋壁

言之未發鬼神不知言之既發駟馬莫追多言者召
禍之門簡言者聚福之基故君子慎之擇其嘉言而
出之擇其悖言而絕之

右箴擇言

函人惟恐傷人矣人惟恐不傷人函人豈皆仁矣人
豈皆不仁術之所專其志則遷故君子慎之擇其術
之善而治之擇其術之不善者而違之

右箴擇術

友者易狎是以移人移人於義德與之日新移人於
利惡與之日均故君子慎之擇其益友而近之擇其
損友而遠之

右箴擇友

君子進則有兼濟之地退則有獨善之地邦有道而
不穀耻也邦無道而穀亦耻也趨舍之分榮辱之至
故君子慎之擇其地之安者而履之擇其地之危者
而避之

右箴擇地

酒箴

南至夜飲讌于壺社孺文勸余作酒箴

爾性湛靜物莫累心酒有何好俾爾酣淫爾儀無翼
爾言無譔爾之暴棄不顯其臨父母維憂朋友維箴
徹爾禮飲毋過三斟

躑躅杖銘

陶辭曰策扶老而流憩扶老杖也杖者所以
扶老也於少者奚宜山行忽遇絕壑攢峯鞍
馬所不能行肩輿所不能陟脚倦力疲屢坐
以噓于斯時也又奚暇待老而杖也宜陽子
歸自谷雲憇于脩林之下而見林中多躑躅

斬之以為杖其高過吾肩一尺二寸性甚剛
燥叩之鏗然有金聲焉登疊石過元化踰桃
麻峙其間數十里險阻嶽崎皆賴此而濟其
功為多可無銘乎

其處也待人之求乎其出也扶人之顛乎余將烏巾
白氈度千峯越萬壑兮翱翔乎毗盧之巔從余者誰
歟其惟君乎其惟君乎

酒壺銘

有鬻瓷器者為酒壺容一斗而鉅其口如罇
口有蓋焉請余為銘以燔之書與說命一句

語

啓乃心沃朕心

太華古硯銘

藍浦出美石士大夫侈硯材者非藍石不蓄也始太華有文硯甚珍之藍出也旣歿家人謀以殉其弟曰茲惟先生之文章所繇出與棄擲土中與瓦礫同朽孰若留之人間俾為人愛惜乎以殉不可於是為之銘曰

先生有苦心而人莫得以窺之先生有大業而世莫得以知之孰其知之惟茲一片之石蓋將剔汝之骨

涸汝之澤以彰施黼黻之色先生既歿惜乎石乎吁
嗟乎石乎

演和尚畫室銘

余住東菴為菴主守玄子銘其經室曰兩函
雲月一粒山川妙相無邊玄之又玄守玄以
新刻圓覺報之既而法演和尚欲謁余銘其
畫室知余不喜佛畫難其贊余惟演也師慧
日上人日師雙嘿長老嘿師景澤尊者實四
世為東菴主人雖無贊可不為銘乎

圓者性之珠歟覺者手之蓮歟彼道人者非文殊則

普賢歟

幽蘭子詩囊銘

李賀雖窮猶有昌黎幽我寥我錦囊之詩

河圖書筌銘

余讀易常一卦五十遍象河圖作書筌其法
自一而九自二而八自三而七自四而六自
五而五恰滿五十遍餘其中五數每十遍筌
其一反復開闔雖至百千遍可也遂為之銘
曰

河馬獻文大教聿紀凡天下文孰敢離此我取厥象

刻紙成圖一闢一闔以數我書一九相求二八作朋
三七為耦四六類從五五比和十數五滿贏其中五
遇十一筭變化以成幹支畢張神明相余其與文章
吳敬父古硯磬銘

首陽吳敬父得古硯磬各一使少華道人筮
之仍以刻焉是年甲子

月麗于河兔濡其首君子用昭于身吉小人尚其口
凶象曰河入于月明不窮也用昭于身吉尚其口凶
文不徒行也

出于泗利用享于王入于海幽人以貞象曰利用享
于王昭其聲也幽人以貞弗惑于行也

右磬

徐步軒銘

觀聖子戲于庭輒吟四言為軒銘

趨者必躡躡者必顧當其顧時惟恐人笑笑而復馳
畏人先也我思其故咎在後者爾無先心彼趨何為
盍徐爾步俾人毋躡

袞衣銘

檢文書篋中得方寸木札書曰庚午八月壬

午夢趨召上殿額曰湛露之堂上顧侍臣
致綠篚臣前啓之紅錦也上曰乃予袞衣
其銘諸臣踰階久之援筆書曰錦貴者之服
也其密理而文盛者以為袞昭德也又為銘
幾句有曰星辰以織之雲漢以濯之餘記不
起噫曷以我匪思匪寐而乃夢及茲曷以我
云蓋余時聖廬人惡因以夢是我亦異而已
矣雖然君命也委諸迷茫則不可也爰補
所忘為一篇

篤恭我

辟王式如金式如玉昭我

王度齋明殿

服厥服維袞朱質陽陽冒茲下土載錫之光星辰以
織之雲漢以濯之日月以披之山龍以絡之相袞有
理經緯攸序相袞有文純粹乃著自昔黃王貽厥采
章明德元吉昏德其殃辟王萬歲有此袞服光被四
國有順無數締繡之弗彰臣請明之絲綸之有闕臣
請補之

東宮冊封賀箋

以下三首
成川時

東宮正名仰 寶籙之增固止价頒慶覲 綈儀之
荐行萬年宗祊千官蹈舞恭惟錫民爾極 貽孫有
謨 七旬之治愈勤猗歟不衰者志氣三朝之講無

曠展也。是法於家庭茲屬中陽之叶祥益驗上穹之垂佑伏念臣材實散櫟志則傾葵趾滯東明舊邦縱阻呼嵩之列身與南畝遺老恭獻祝華之誠

正朝賀箋

天得一地得一王得一咸仰叅育之功歲之元月之元日之元茂迓靈長之福三宮和氣八域歡聲恭惟巍乎有成所其無逸戒往牒豐豫之失悉革恭華之風體大易損益之方屢頒寬大之詔肆當陽昭之節益膺日升之休伏念臣治郡才疎憂時髮短舉筆不忘規諫雖愧歐陽獻帖之誠扶杖而聽詔書

庶贊方春議賡之化

大殿誕日賀箋

聖節屆于九秋奠堦抽十三之葉皇天綏此百祿
曆衍萬億之籌八域嵩呼五雲高處恭惟 聖聰作
后克勤于民乘長治久安之機而無聲色政游之好
惟 大德永命之效斯有軒昊舜文之年茲屬 虹
流之辰益迓川至之慶伏念臣周南臨滯日下神馳
唐宮之睟日增傷縱想蓼莪之孝思華封之聖世獻
祝愈切葵藿之微誠

進 東宮進德八箴

伏以 卽下年甫志學德器早成此實由於
睿姿之粹美 家法之純正臣以 冑蔭舊
物曷勝忭頌臣年衰病痼豈合重叨講席而
犬馬之誠惟一瞻 耿光是急雖黽勉隨行
自惟志業日退終無以仰裨 詔問敢綴古
人遺旨為進德八箴拜手以獻倘蒙不以人
廢言臣雖退伏田里猶侍 溫文之容矣伏
惟 留神省察焉

一曰敬 祖訓

有謨有訓 家法孔正夙夜祗服惟 聖祖命

二曰謹子職

晨昏定省婉容承志事無由己在燕如侍

三曰勤講讀

損去虛文勉求實得逐節明辨有疑勿畜

四曰納箴規

毋或耻過虛心納誨毋徒唯唯有聞即改

五曰慎言動

言欲簡當動必安詳誦習九容造次勿忘

六曰養志氣

學在立志志乃帥氣匪惟養德亦以養體

七曰去玩戲

細玩小戲終必喪志母曰何害禁於未視

八曰遠柔佞

柔性易狎佞言無忠遠之有道曰惟正躬

致仕謝箋

致仕奉 朝賀臣南有容恭遇某年月日 聖上因

臣休致之請 誕降恩批特允微懇 臨殿宣麻榮

動簪紳兼又 軫臣家貧 命賜衣資食物 德意

隆厚迥出常格臣拜稽祗承不勝榮感悚惕之至謹

奉箋稱謝者臣有容誠惶誠恐稽首稽首 上言伏

以殘年丐退冒控三休之章 榮詔賜俞曲循一辭
之願啣 恩此日圖報何時伏念臣器不踰人學非
志道文章之華國之譽臣竊自慚政術昧需世之方
上亦俯察橫經雷肆螢爝之照何裨攬轡天衢駑馬
之力難強虛叨 簡擢之寵杲切兢惶之忱鐘漏之
行宜休商量已久替履之 恩蔑報遲回至今顧今
年正及於乞身而古典敢引於瀝血 聖明在上非
敢以老為言廉義有嚴茲乃援經陳悃何幸 恩綸
之失許更紆 寵麻之臨宣一言即 俞信乎慈天
之易格 十行誕降藹然陽春之方噓蓋 九重體

物之仁必欲咸遂故一个由心之懇亦荷 曲成矧
茲 錫賚之德音別是 惠養之殊典雪屋初暖殆
踰挾纊之 恩寒厨復煖矣啻推食之 渥拜手以
謝銘骨何忘茲蓋伏遇 至行純德英謨毅烈章義
弘倫光仁敦禧體天建極聖功神化主上殿下與物
同春 法天運化載歌載舞群生罔壽域之中不饑
不寒一邦頌 王道之始遂令鹵姿亦被 隆眷臣
敢不飽 德而退鼓腹以嬉依北斗而望京敢安輦
戶之偃仰指南山而祝 聖擬和樵社之詠歌臣無
任望天仰 聖激切屏營之至謹奉箋稱謝以 聞

面賜 手書御詩謝箋

致仕奉 朝賀臣南有容恭遇某年月日 聖上特
於寢殿召對 面賜八句 宸翰仍 命芸閣鐫行
分藏史庫以為永久壽傳之圖 辭教溫淳 恩數
曠絕臣拜稽祇奉不勝榮感悚惕之至謹奉箋稱謝
者臣有容誠惶誠恐稽首稽首 上言伏以華誥臨
宣方頌曠前之 殊禮寶章浚降更軫垂後之永圖
蹟留蘭臺榮動梓里伏念臣鈍姿難強脆質易衰取
樂桑榆冒陳告老之懇 許歸蓬蓽獲遂投閒之情
頌麻玉宸之前偏荷優異之 渥緘箋 錄仗之下

曷罄榮感之忱不料自天之題又在翌日之名
玉音諄摯既示繾綣之餘懷奎章焜煌更致嘉尚
之盛意文垣忝武恩言至及於先休耆社叨名
榮遇益罕於前牒矧茲鉁行之命亶出壽傳之方
抱歸衡門猶感一身之榮耀分藏石室尤幸百世之
傳者今之所蒙古亦有否茲蓋伏遇至行純德英
謨毅烈章義弘倫光仁敦禧體天建極聖功神化主
上殿下使臣以禮體物無遺雲漢為章景周王
之壽考瓊林頌藻美宋臣之優游遂令無似之賤姿
亦叨不朽之盛事臣敢不歸詫掄社拜祝楓宸奉

琬琰而傳家何羨揮金之漢傳歌耕鑿而送老竊比
擊壤之堯民臣無任望天仰 聖激切屏營之至謹
奉箋稱謝以 聞

自題畫像贊

簡於世仍以靜為體淡於衆仍以拙為用滄海明珠
無心故獲石室秘字有緣者識道在味其無味處身
游才與不才間向遇長康好手必將使汝野服而山
冠

俞文翼公畫像贊

威重真漢相之容憂樂乃范公之志事 君以身為

規度不動如山。事物無心於重輕。其平若秤。忘機世外。則麋鹿群而不亂。決疑帷中。則著龜久而愈神。韋布歸吐哺之風。鄉黨化却金之操。生為三朝之耆碩。歿有一代之完名。於戲夙瞻厖眉。惜潞公之易老。今題肖象。願隨子之與歸。

涵月大師法相贊

兩函雲月。一粒山川。雲飛山寂。月印川娟。超然空有。惟大乘禪。菩提非樹。孰測明圓。明故無礙。圓故無邊。有能曉者。法相是傳。

雷淵集卷之二十七

雷淵集卷之二十八目錄

講義

經筵講義

廷奏附

書筵講義

尊賢閣進對

雷淵集卷之二十八

講義

經筵講義

廷奏附

丙寅五月十一日晝講講周禮地官司造講畢臣曰
周禮六官即周公運用精神之書非但經緯一世而
已其豫慮後世衰微之際措置區畫者至備且詳周
公既歿而六篇尚在則聖人所以運用者未嘗亡也
故周室雖中微而猶以是書維持天下列國名臣治
其國必以周禮應對四隣必舉周禮晉人使於魯者
歸告其君曰魯未可取猶秉周禮聖人制度之維持

天下後世者蓋如此矣降及戰國周之地方不過數
百里僅比邾滕小國藐然居強大諸侯之上而不失
天子之尊諸侯欲僭制惡周禮害已至削去其籍而
猶不敢萌非分之心此莫非周禮六篇之力而聖人
精神所注者貫徹八百年之久如此然後可謂制作
矣是書豈可以文物度數之末求之哉周禮六官理
財居其半理財固國家之大事然必也以德和民而
後財可理故大學將言用財而先言君子先慎乎德
本末如是矣王安石徒急於理財而不探其本所以
民受塗炭之禍身為聚斂之臣蓋不知周公制作之

本意而輕用其法則鮮不敗矣此後世所當戒也

是日召對論魏徵告太宗待君子敬而疎遇小人

輕而狎一段曰貞觀之治可謂盛矣比之周宣王則
亦有所歉然矣周宣中興之業不外於任賢使能四
字夫所謂賢者有德行之謂也如此之人置之輔弼
之位而倚任之能者有才能之謂也如此之人處之
百執事之列而器使之夫如是故賢者既皆展布其
所學而能者莫不盡其力今太宗雖尊寵賢者而至
於國事得失則每訪問於小人彼小人者其心何可
測乎伺候君上之意向隨時俯仰以濟己私苟利於

已無所不為雖君上踈棄之乘時圖進之心未嘗一日而忘况君上與之謀議國事則其投間抵隙負國害政之事何可勝言乎此魏徵所以極言箴規者也小人既與聞國政則君子雖在高位自然阻隔不能親近於人主君子阻隔則小人自然日見親狎勢固然矣以太宗之賢而其治道終有愧於三代盛世者職此之由而非魏徵亦不能者得人主病痛如此親切而盡言無諱也 上曰待君子敬而踈遇小人輕而狎自古帝王之通患而其實人主先有私意故小人見親狎矣臣曰人主果無私意豈肯與小人謀議

國政而親近之乎彼小人者觀其貌則便僂聽其言則辯給皆足以悅吾心而吾心之所欲彼又先衆迎合此所以親狎而不知其可惡此皆私意蔽之也太宗雖賢其言與行不相副者多矣至如魏徵言聽計從委任至矣而宮中燕居嘗有會殺此田舍翁之語此其私意之發見於不知不覺之中者也 上曰親賢臣遠小人前漢所以興隆也親小人遠賢臣後漢所以傾頽也此武侯之語也人主一心公私之別而興衰係焉人君之道豈不難哉 上又曰人君晚節誠難矣以唐太宗之賢晚節殊無可觀矣臣曰 聖

教及此臣不勝欽仰雖以匹庶言之血氣既衰之後則昔之有名節者變為異軟昔之有志操者變為鹵莽況人君居紛華波蕩之中苟無學問之充養將何以善其晚節乎堯舜及三代聖王尚矣不論以三代之後論之則衛武公之後惟漢光武晚節好學其言曰我自樂此不為疲也是時光武春秋已將六十矣臣之仰期於聖上者固在唐虞盛際而若光武之老而好學亦可謂難矣上曰然矣臣曰臣有風濕之疾病兩耳聽瑩聖教之下或不能承聞顧何以出入經筵備數於顧問之列乎惶恐甚矣上曰

重聽何傷善為文義好矣

丁卯三月十二日 朝參畢 上命玉堂入侍臣與

副提學趙昉履校理尹光紹修撰李彛章進伏 上

曰近日玉署之門久閉今日則頗濟濟可喜矣昉履

仍請頻開 講筵 上笑曰近日儒臣講學或帶得

黨習因以傳會文義如此則恐無益矣仍謂臣曰此

儒臣講學非不善而亦不免此矣又曰近者儒生輩

講學亦不善矣臣起而對曰臣本鹵莽無學術 聖

教之下不勝惶愧矣第儒生輩講學不善亦 殿下

自反處耳 上厲聲曰儒臣之謂我自反謬矣予何

以人人而教之乎予若有酒色貨財狗馬土木之失而使國人效之則儒生輩之不善講學固予自反處也予雖涼德姑無此過此輩之不善講學豈為予自反處乎臣又起而對曰經曰天生蒸民作之君作之師 殿下即一國之師也儒生之善為講學罔非

殿下教育導率之功則其不善講學豈非 殿下自反處乎 上不答諸臣以次退臣進曰今日之舉甚盛矣引見公卿近臣講確治道進接庶僚庶老廣詢民弊可知 聖志之奮勵矣自古時君哲辟未有不奮勵而能做一代之治者然奮勵有二道有奮勵於

義理之源者有奮勵於功利之末者武王之受丹書
三日不寐周公之思兼三王坐而待朝此奮勵於義
理者也唐太宗之汲汲於要譽宋神宗之尊尊於理
財此奮勵於功利者也其奮勵則同而發於心施諸
政者有公私之懸殊故民俗之淳澆風教之汙隆隨
而異焉武王之後繼之以成康國祚綿長至於八百
年之久唐宋之君不過一再傳而危亡之徵疊見層
出遂至於不可奈何人主一心所嚮其禍福之應如
此願 殿下深究義理之本無惑於功利之說以作
新一國則方可謂奮勵矣 上曰儒臣此言誠好矣

遂退出

戊辰三月十五日

召對讀資治通鑑唐昭宗紀盡

一編臣曰昭宗之世真所謂君不君臣不臣雖有智者無以建一策以自強矣惟明主為能正心修德任賢使能保邦於未危衰世之君明不足燭姦公不能勝私馴致權倖竊弄威福下移而猝然欲整頓綱紀董飭臣工則彼權倖之臣揣知主意乘間逞讒反以樹黨專權欺君怨上等說中傷忠良之臣而其君信之於是彼之威勢益張而天下解體如此則不惟無益於治反促其亂矣濟屯傾否自非賢明之君英烈

之輔不能也如 皇明毅宗皇帝豈是昏庸之主而當國勢既弱王綱不競之時徒欲以法度制群下用舍顛倒政令繁苛在朝之臣舉懷疑貳情志否塞遂至於亡此可戒也大抵衰世之君或一切委靡拱手受制於權臣或稍欲自強汲汲收攬其權綱二者雖異既無德以臨之則同歸於亂而已所謂德者此心光明無所私而已此心無私則彼小人者無以投吾之間而中我之慾矣如是則小人自踈而君子見親舉措得宜而綱紀自立矣雖然光明其德非資學問之功不能乃知傳說以後歷代賢臣之必以學問勸

其君決非空言而已也

丁卯二月初九日監試會試榜出後上命諸試官
並入侍玉色不豫良久下教曰文科重於生進而
只以等之高下而定甲乙未聞別擇壯元之事而獨
於生進有此謬規甚至於舍其高等遍拆二百皮封
必擇京華閥閱之人而擢置壯元云不公不正莫此
為甚矣國試事體嚴重豈可出榜之前披見皮封乎
且生三亦一等中人而此則必擇鄉曲無勢者為之
此何道理予欲自今日為始痛革此弊故生壯生三
已為易置試官知此意可也臣進曰生進壯元之極

擇不知昉於何時而其來已久其意亦美矣蓋生進
壯元以一儒冠裒然為百人之首而始陞於太學非
允流所可與也故出榜之際不拘等之高下擇於一
榜之中必得一時負望之士以處之者已成國朝
故例閱累朝而無變是皆聳動士林之一端而儲
養人才之初階也恐不宜率然改之生三之必以名
品稍低者處之臣亦未知何義是亦三百年故事今
若以生壯而屈置其三生三而擢居其魁則無乃有
駭於聽聞而亦何以服多士之心乎伏願更加三
思焉上曰此事刊於大典乎不過一時試官之所

權衡則何謂不可變改乎亦何謂有駭聽聞乎臣曰
凡人名品自有定評是豈試官所可高下者乎凡為
壯元者諸試官爛漫商量僉意歸一然後處之則是
固有壯元之物望者耳今若以其極擇者屈而置之
不擇之地以其不擇者推而陞之極擇之地則一時
多士驟見所未見之事豈不大駭乎臣之愚見如此
不敢有隱於咫尺 詢問之下矣 上曰予志旣定
而試官南有容獨出固爭終無將順之意極為寒心
矣臣曰臣誠惶恐而此係 國朝故事不可咄嗟間
變改從容博詢于大臣諸臣而處之何如 上曰朝

鮮大臣雖權重予之處分孰敢變動乎南有容特罷其職

壬申十二月某日 上幸彰義宮停輿于宮門外狎下小紙于承宣 諭以傳禪之意承旨齊聲覆逆還納小紙 上不受還授承旨承旨涕泣還納如是者累次臣以侍衛立侍稍遠仍進曰臣雖未敢知小紙中辭意之如何而伏聞俄者上下酬酢則實是非常之舉 殿下何為而狎有此 下教乎 上正色曰此事臣難矣予常難之矣雖然今日之事予志已決雖卿不能回予心矣臣曰 殿下上奉 慈殿下有

聖子神孫邦內寧謐有磐石之固方當恭已南面安
享太平而千萬意外乃有此非常之教今日群臣
雖甚無狀孰敢奉承慈殿聞之必將驚憂於靜攝
之中而東宮纔經紅疹氣未復常忽承此教豈不
驚惕添恙乎殿下何不思之甚也今日之事臣等
必承還收之命然後敢退不然臣等雖死於輿前
不敢退一步矣上曰卿等雖以為猝遽予則此心
已久矣今日動駕時予告于真殿又仰稟于慈
殿已承勉諾之教卿雖千言萬語何能回予此心
乎且侍衛之臣何敢離次進前乎臣曰臣以侍衛之

臣離次煩聒誠不勝惶悚而今此下教實是非常之舉臣何可膠守常例而不盡所懷乎先大王臨御四十年政令施措無不俯體群情而行之今者殿下此舉億兆民情之所不欲則先大王陟降想亦不懼於冥冥之中矣殿下雖以已告真殿為教臣則謂先大王必不受殿下之所奏矣且殿下之大位即受之先王者也慈殿何可勉諾於殿下釋位之請乎殿下雖以仰稟慈殿為教竊恐此教不足以拒臣等之言也伏願亟速還收毋令傳播而使一國驚動焉上曰予志固定何

敢強煩如是乎南有容同春秋除授明日考出實錄
以來可也仍入御宮內

書筵講義

乙丑五月十七日 書筵講小學萬石君事臣曰讀
書之法須於本章文義外推而知言外義理方為有
益雖以此章言之自古孝謹如萬石君亦豈無之而
其子孫之賢未必皆類父母今獨萬石君子孫其賢
克肖其父兄此無他萬石君家行專以誠實為主躬
行而率下故雖未嘗以言語隨事誨責而其居家事
為無非可為子孫法者故為子孫者慕效觀感自歸

於善萬石君本傳稱奮無文學不言而躬行信矣因
是而推之則不特父兄之教子弟當如此凡在上之
人教下之道無不如是誠能以誠實之道躬行而率
之下之人自然敬慕信服入於教化之中矣不然而
欲以區區言語隨事訓戒而實德不足則亦何以感
服其心而使之導教乎故傳曰以身教者從以言教
者訟 卽下若於此等文義推思而體念之則讀書
之工庶得將就矣 世子曰萬石君固孝謹矣亦可
謂嚴乎臣曰 卽下之問果善矣夫子孫有過而父
兄不食則其嚴實過於誚責萬石君不可謂不嚴矣

然為子孫之有過至於對案不食則臣嘗以為過矣
子孫有過輕則誨諭之重則捶撻之必使之知其過
失而改之乃父兄之道而至於對案不食有似畜怒
者然此甚過矣元景夏曰子孫有過訶責之可矣何
可對案不食以待其惶悚而感動乎此甚過矣上番
之言固好矣其所謂不可謂不嚴者臣未知其然也
對案不食豈可謂嚴乎只可謂過矣臣曰此自萬石
君一家之法若以君子大道言之則終過矣臣之以
為嚴者嚴固有過中者萬石君之嚴過於嚴者矣景
夏曰今日則日候不熱正好開講而風氣不佳時則

必自量為之如何臣曰古人有云讀書工夫譬如負
擔而行負擔者休時乍快而復肩其擔則此前似重
讀書者休時固好而復展其書則此前益倦此善諭
矣 卽下方在冲年似不能全無暇時而亦不宜太
多休時矣自今稍減其行數而日日開筵俾無間斷
則 睿學幾何而將就乎 世子曰唯

十八日 書筵講疏廣事臣曰疏廣是漢宣帝時名
臣觀其教子孫之法專以德行為先其賢可知而又
適為太子太傅之官其於輔導太子必多裨益矣今
雖以年老乞歸此在疏廣固為高致而太子左右何

可輕棄如此宿德乎臣於漢帝之許歸不能無惜之
之心 郎下之意以為如何金若魯曰禮經有七十
致事之文而亦有關係國家之人不許退老之文廣
之告歸雖為高致而其宿德雅望實合於輔導之任
則其許退無或太遽乎上番所達蓋欲知 郎下之
意故如是仰問 郎下之意果如何 世子曰不許
歸宜矣若魯曰古人云漢宣帝使疏廣傅太子其時
太子即元帝也元帝懦弱廣知其不可輔導故見幾
而去廣之心果如此則臣竊以為非矣既為太子之
傅則竭誠殫心以盡輔導之責可矣何可輕易退去

乎雖然決不可輔導以就令德則告歸之外無他道理乎 卽下以為其去宜乎不去宜乎 世子良久曰既不可輔則去之似宜矣臣曰此言出於先儒註說非出於正史疏廣之心未知真的如此先儒之說蓋以其去就度其心耳成天柱曰石奮三父子以謹慎聞於郡國此固賢矣然以一家家法言之則善矣至於國家事只以醇謹不能辦得矣如汲黯則面折廷諍至以武帝為內多欲而外施仁義自後世言之則此豈人臣告君之言乎然而武帝猶以社稷臣許之 卽下以兩臣孰賢 世子曰在家則萬石君父

子賢在國則汲黯賢若魯曰汲黯雖賢武帝若不能
容受則何以盡其忠乎臣則以武帝為賢於汲黯臣
曰武帝之容直臣固賢矣然安知武帝之容直臣非
汲黯諫諍之力有以致之乎故治國以得賢為本講
畢臣曰讀書有疑處方能進步此朱子之言也 郎
下方在冲年讀書豈能無疑處而今未聞有發難之
語臣等悶鬱矣果無所疑而然乎抑有疑處而尋常
過去之乎此後則讀時可疑處必拈出下問如何
世子曰唯

十九日 書筵論疏廣教子孫事臣曰疏廣此言非

為一時偶發之言實為子孫深長慮耳世俗人情每欲其子孫富厚多財此固常情然子孫賢則可保其家業而如或不賢則恃其富豪驕奢無厭以至於危身敗家者溜溜皆是自古富而不侈者鮮矣侈而不驕者亦鮮矣既侈且驕而不危身敗家者無之矣雖以疏廣子孫之請立產業觀之其為人之不肖可知不知遵奉父兄之意顧以田宅為重向使疏廣不為之遠慮曲從其意欲則豈不至於驕侈亡家乎此則匹庶家事耳若以帝王家論之則自古有國家者未有不以勤儉而興驕奢而亡者 卽下方在冲年姑

未廣覽前史前頭自當知之矣儉者德之本人性能
儉則凡衣服飲食輿馬居處皆不求華美故外物無
可以撓奪其志操既不為外物所奪則為善之心不
遷移矣故古語云瘠土多良民非虛語也我朝則
自祖宗朝立國規模專尚恭儉卽下誠能遵守
列聖之規模奉承大朝之教訓常以恭儉二字存
諸心則為學之心益固而不遷矣此臣等之望也
世子曰唯臣曰臣既以疏廣一事陳達而此則不過
一家教子孫者之法耳若漢文帝之事卽下最宜
知之文帝漢之賢君嘗欲作露臺召匠計之直百金

文帝曰百金者中人十家之產吾奉先帝宮室常恐羞之安用臺為遂不築臺夫以天下之富何惜乎百金而猶且不為者誠以恭儉之德已堅於心中不為物慾所奪故耳非強勉為之而求名於後世也若此者可為帝王家子孫之法矣成天柱曰臣之所望於郎下者不在於漢文帝直欲郎下為堯舜耳孟子曰堯舜與人同耳堯舜之道亦非高遠難行只在吾心上而特以人無學問之功故義理為物慾所蔽失吾本然之性不能為堯舜耳誠能有意於學問則堯舜決可為耳臣曰臣之望於郎下者豈止於漢文

帝邪臣之所陳者特其儉德耳堯舜豈不儉而若茅茨土階漆器之事特上古事非可論於後世也若論為君治國之道則臣亦將言必稱堯舜矣天柱曰
邸下平居讀書之時有欲為堯舜之心乎 世子微
笑曰廷言欲為堯舜無益矣臣曰昔程子勸宋仁宗
以堯舜之道仁宗曰堯舜朕何敢當程子愀然不樂
曰陛下此言非天下之福也仁宗以堯舜不敢當故
程子憂之 邸下則以廷言堯舜為耻其欲為堯舜
之心則可仰揣矣苟能克是心臣民之幸也昨日臣
以讀書疑處下問之意仰達如有疑處下問如何

世子拈出包孝肅公尹京時一段問曰予之者與辭之者孰為尤賢臣曰 郎下之意以兩人孰賢 世子微笑曰我則以予金者為尤賢矣臣起而言曰

郎下之言是矣予金者為不忘死者之恩此為尤難矣天柱曰臣意則兩人之賢難為軒輊矣臣曰昨日下午番養志二字陳達此言誠好矣 大朝靜攝之中當此盛熱特開 經筵聖意所在蓋欲為 郎下勸

學而以身帥之也萬石君家子孫猶能遵父兄之教况 大朝身教而 郎下無感動奮發之心乎願自今加勉古人多為勸學文字而朱子所著最為切實

使人感動字句不多臣庶幾誦之矣其文曰莫謂今日不學而有來日莫謂今年不學而有來年日月逝矣歲不我延嗚呼老矣是誰之愆仍解釋其義而陳之曰 邸下方在冲年讀書豈無厭怠之時乎其心中必曰我今冲年雖自明年勤學豈不為學乎今日雖遊戲豈無明日乎今日如此明日如此又明日如此則是終無進就之日矣此心甚害於工夫矣未知邸下果有是心乎否乎 世子曰是心則不甚有之矣臣曰然則幸矣勸學文在古文真寶第一卷願邸下以此文寫諸壁間時時諷詠則不為無助矣

世子曰當如是為之矣天柱曰上番所達好矣學問之病莫過於因循欲除此病必先立志願 邸下學導勤學毋失此時焉 世子曰唯唯將退天柱曰俄者因上番所達有朱子勸學文書付壁間之令矣內間亦有古文真寶乎此文當自內間書之乎令本院寫進乎 世子曰內間有古文真寶矣

六月初一日 書筵講董邵南事臣曰人之居家為善有二者之異焉有以為善為本來性分內事導導不急不求人知者又或有行一善行出一善言而竊竊然求知於人以取名譽者為善則一而其心之誠

不誠判異矣是故不求人知者人雖不知而其實德
在躬有足以感格神明故上天監臨降之福祥求知
於人者一時聲譽雖或隆洽其素心不誠故終無以
孚格上天矣今以此章之旨觀之董邵南不過窮鄉
一賤儒而隱居行義不求人知然高高之天則蓋已
俯鑑其至行而降祥下瑞於其家以至蠢蠢畜物如
鷄犬之屬亦皆感化非至誠為善何以能如此乎天
人之際尊卑懸絕雖似不相接而至其感應之理則
昭然如影之隨形響之從聲其可忽哉董邵南不過
一匹夫而行善於一家之內猶能上格皇穹下孚微

物矧乎人君居億兆臣民之上果能至誠行善則上天之嘉悅而保佑之者將使四海民庶以及草木禽獸無不被其澤矣伏願 邸下於此等文義留意諦着焉 世子曰唯趙觀彬曰董邵南一匹夫而行善於一家上天之感應已如此若 邸下則一國之儲嗣若果行善不怠則天之降祥豈特鷄狗之相哺而已乎 邸下天質岐嶷令聞夙彰臣民固已愛戴無已目今加勉於 邸下者一孝字外更有何事乎惟願孳孳加勉益膺天休焉臣曰所謂祥瑞者非必麟鳳芝草甘露之屬也朝多吉士野無遺賢風俗醇美

萬物成遂乃為上瑞若董生者其孝慈之行如此而不求人知故其地之監司不知其賢其國之君不聞其姓名此在董生益可見其賢於人數等而以其時朝廷用舍論之則可謂賢矣以此一人而推之則安知無道德經綸之賢於董生者隱居不出而朝廷莫之知者乎觀彬曰此言誠然矣國家之得用一賢人誠有關係臣竊為時君惜之也 世子曰張公藝一忍字好矣何為書百忍字以進乎臣曰此乃百事皆忍之意其本只是一忍而隨事必忍之意也成天柱曰不過此意百者舉大數言之耳雖然此亦公藝

九世同居之法非君子之大道也當怒則怒遇喜則喜此乃人情何可隨事皆忍乎如是忍過之際必多拂其本性矣決非可法之事也臣曰忿怒似同而實異忿則多出於私意隨事忍之使之消融固好而若怒則當怒而怒初非私意也何必以忍為善乎觀彬曰講官所陳詳悉矣

初三日 書筵論柳氏家法事臣曰學問為善是人道當行之事衣食奉養亦口體不可已之事然學問之心不可使少有滿足衣食之養不可必求其華美少有華美衣食之心則學問之心為外物所奪侈靡

流蕩終至於失其所守故古之哲母有以苦蓼及熊
膳和丸以啗兒以助其勤苦者汪信民之言曰人常
咬得菜根百事可做蓋謂其澹泊辛苦之至為善之
心自然堅固外物之來感者自然不能撓奪故耳今
柳氏家法以學業未成不聽食肉亦此意也雖以帝
王家學問之道言之唐高宗時皇太子久在內不出
典膳丞邢文偉為之徹膳仍上啓於太子曰古者太
子左右常有徹膳之宰太子不讀書不親士則宰為
之徹膳禮也近者怠於接見臣忝備所司不敢不徹
膳高宗聞之喜曰邢文偉嫌我兒不讀書不冒與肉

喫此人甚直由此觀之雖在儲君之位學業不勤不聽食肉固自有古法矣惟 邸下自今日為始益固學問之心勿使外物有以撓奪克念禮經徹膳之義常令志意有所警發則臣等之望也 世子曰唯臣曰臣嘗考院中日記自 大朝嘗以節飲食三字勉戒 邸下矣 邸下方在冲年腸胃未壯三字 聖訓恐不宜暫時怠忽也古人有言嗜書如梁肉願 邸下以書代梁肉咀嚼其味則書中之味未必不如梁肉矣 世子曰唯臣曰臣於燭至則執經史躬讀一過文義有可達者矣古語曰夜對勝晝筵蓋夜則

萬籟俱息耳目所接稀少故心自然靜氣自然清此時讀書益有味矣 卽下近日連日開筵似有奮發之意臣等不勝喜悅而或有以此自足之心萌於中則前功盡棄矣願日日開筵自非頃稟之日無或一日無故輟講如遇頃稟之日必須秉夜名對講論古書而經傳義理之外亦豈有不可言之事乎間巷風俗稼穡艱難莫非可聞之事而一堂之中情志流通雖以臣等末學罄竭其所知則亦豈無一二可采乎如此然後學問之工方可有長進之效矣 世子曰當如是矣李周鎮曰上番所達好矣 卽下宜體念

焉

初四日 書筵臣曰昨日前受音中諸子復昏定於

中門之北一段臣解釋未瑩 邸下想未分明曉得

故敢達矣所謂晨省於中門之北者非仲郢出至小

齋後諸子晨省於小齋中門之北也乃將出小齋之

際諸子晨省於寢室中門之北云爾及至歸寢之後

則又昏定於寢室中門之北即晨省處也昨日以中

門之北錯認為小齋中門之北故上下文義自相矛

盾夜間更思之真的如此故更達之矣 世子曰然

矣臣仍讀新受音自姑姊妹姪至有小改一遍仍進

曰嫠是喪夫而未及改嫁者我國即禮義之邦婦女
喪夫守節不嫁至於閭閻下賤皆能如是矣中國不
然寡女皆改嫁而其中或有貞婦烈女守節不嫁者
則國家亦有旌表之典矣 邱下曾見三綱行實所
畫者乎 世子曰曾見之矣臣曰忠臣不事二君烈
女不更二夫故婦女之能守節者蓋與忠臣并稱矣
李周鎮曰纈文綃似是綃之賤品臣曰纈者結也蓋
取綃種種結之染色了解去則其色斑斕如錦繡以
今言之則蓋畫布之類也工省而品儉故用之耳尹
學東曰公綽所謂必待資裝豐備何如嫁不失時者

誠格言矣。近來閭巷間奢侈成風，婚姻時綵幣不豐，則大以為耻。故貧者有年過三十而不能娶妻者，甚至於終身不娶。此誠痼弊矣。臣曰：古者婚禮只以儷皮為幣，後世易之以玄纁兩段。近來士夫家猶遵此禮，而至於閭巷間，則隨其家力而為之。錦帛多者至五六十段，少不下數十段。貧者何從而辦此乎？婚娶之過時，職由於此，而已成痼弊，不可猝革。必須上自宮禁，專尚儉素，有大布弋絺之風，然後貴戚宰相之家，有以觀感承化，而庶民奢侈之風漸次可革矣。此雖非緊於文義者，既有言端，故并陳之矣。世子曰：

是矣臣曰公綽一家世有名賢良由子孫善守其家
法故耳不惟閭閻士夫家如此一國自有一國制度
創業之初明君哲輔相與綢繆創立規模固非後世
所可輕議也但當恪謹遵奉振其頽廢而已故繼世
之君謂之守成蓋謂守其成憲云耳後世人君率多
輕信喜事之徒紛更祖宗之良法如是者鮮有不至
於危亡甚可戒也 世子曰唯學東曰 邱下淵默
太過未嘗下問疑處臣等悶鬱矣疑處可問者下問
何如 世子良久未答臣曰心中果有所嘗疑惑者
則下問好矣而如或未嘗有疑而臨時強覓則不誠

矣 世子曰今番別無可問疑處矣臣曰自今必於讀書時深究其文義如有疑晦難解者或付籤於卷頭或默識於心中待開筵時一一詢問無為因循掩置臣等之至望也 世子曰唯

初五日 書筵論柳母教子事臣曰凡人善惡多係世類韓氏即當時宰相韓休之曾孫韓休性甚忠直人主有過隨事輒諫玄宗每宮中私宴必問左右曰韓休知否語畢而休之諫書已至其賢如此其居家教子孫亦必有法度故韓氏之賢蓋有所從來矣觀彬曰韓休之事 邸下宜聞之上番畢陳之似好矣

臣曰韓休隨事直言上之左右言於上曰自休為相
陛下貌漸瘦何不逐之上曰吾貌雖瘦天下必肥時
有蕭嵩者亦為相嵩是小人入則諂諛以蠹上心出
則欺罔以售己私上因歎曰韓休面折朕過殊不可
堪然既退而吾寢乃安蕭嵩每事將順甚適朕意然
既退而吾寢不安以玄宗此言觀之則其於邪正忠
佞之分可謂辨之明矣而卒不能退嵩者蓋玄宗之
性自有與小人合者而蕭嵩之巧言令色已深入上
心故也夫人君知臣下之惡而不能去則為惡無所
忌憚而其害必至於亡國雖有一二賢臣之在朝者

終不能見容矣故韓休為相未幾而罷繼而有天寶之亂唐室幾亡忠邪用舍之際其可畏如是矣世子曰韓休何名時相耶臣曰唐玄宗時相也玄宗亦唐室中興之君其初用姚崇宋璟張九齡韓休之徒則國家大治其後用蕭嵩李林甫之徒則國家大亂率為逆臣安祿山所逐棄國而走賴賢臣李泌郭子儀等匡濟之力幸不亡國矣觀彬曰唐玄宗一人之身初則為明君後則幾為亡國之君無他在用人之賢否矣世子曰唯觀彬曰臣聞日昨書筵上番陳學業未成不聽食肉文義以邢文偉撤膳事仰達

其言甚好矣撤膳自是古道後世豈復見此等美事
乎假使 邸下不勤於學業如臣等輩豈敢為邪文
偉之事乎假令今日有如文偉者撤去 邸下之膳
肉則 邸下之心悅乎不悅乎 世子笑曰悅之者
似少矣臣曰 邸下下答誠實矣然彼撤膳者之事
為身謀則無益為儲君謀則甚忠所當嘉悅之矣然
悅之者實不易故古禮遂廢而三代教世子之法亡
矣可勝歎哉觀彬曰今日日候不甚熱 書筵從容
矣文義雖無可陳者且使講官畧陳古語中可聞之
事而聽之何如 世子曰好矣臣曰古人有王緯者

其為兒時多病不能善食一日出外而夕歸面有和氣與之食盡一器父母喜而問其故緯曰吾適到某叔家某叔饋以羊肉而其割不正吾却思小學割不正不食之語索刀正其不正者而喫之又之某兄家其席不正吾却思小學席不正不坐之語而思于心曰雖飲食居處之微一有不正則其心從而不正故聖人戒之也遂不坐其席因念吾一日而行小學之道二事如此不已則聖人不難為也念之至此心中自然歡樂面之和食之善似由此也臣嘗以此言思之蓋有此理矣讀書將以行其道也而此人以童子

一日之中行其二事心中之歡樂乃秉彝之天也其理固然矣 邸下進講小學已數年而今將垂畢亦嘗行得小學中幾件事乎 世子笑而不答臣曰無則謂無自為誠實之道有則言之使臣等知之豈不好乎 世子曰自思其合於小學中某事者而無之矣臣曰所以讀書者將以行其道也苟不能行其道是所謂書自書我自我讀之無益矣况小學異於他書始自胎教一歲之中各有一歲當行之事聖人教人之法至為詳備矣口讀其書而身不行之亦安用是書我伏願 邸下自今加勉讀一句必以行得一

事為心造次顛沛勿忘小學中言語則學問日就將
進而讀書漸覺有深味矣 世子曰唯

十六日會講于時敏堂論襄行儉論王勃楊炯一段
傳宋寅明曰云云臣曰傳所陳文義詳備矣大抵器
量則多由於天稟知識則多資於見聞文義講論亦
可以廣知識而諸臣所陳欲詳悉故語端紛多 邸
下恐難詳聽而領會矣古人有言曰舜之恭已有察
邇言氣像蓋敬恭以持已則心地自虛明心地虛明
則照物無遺故舜之恭已時可見察邇言之氣像此
言甚有味矣願 邸下每於諸臣陳達之際益加恭

已虚心之工焉。通言者淺近之言，雖淺近之言自聖人察之，則莫不有至理存焉。故夫子贊美舜德，以好察通言為大。知今日所陳文義，雖無深遠之言，即下若恭已虚心而聽之，則亦豈無一二可擇者乎？夫能察言，然後知識廣而器量益就宏大矣。伏願留神加勉焉。世子曰：唯。世子問曰：常訓之常字，果何義耶？寅明曰：常即恒也。大朝所以特以常訓名編者，一則以為經常當行之義，一則欲使邸下體行無一刻之或間，無一事之或怠也。臣曰：常訓文字以勤學為卒章，聖意有在矣。蓋已上七條皆由勤

學中做得伏願 邸下加勉於勤學二字母負 聖
上勤學之意焉 世子曰唯

丙寅二月二十二日 召對論藺相如事臣曰戰國
時事多出於權詐大抵可法者少可戒者多別無文
義之可以仰裨學問者雖以此事論之夫人臣事君
當舉其君於至安之地繩池之會趙王不往可也而
藺相如勸王行其危亦甚矣人臣以禮事君當納君
於無過之地趙王之為秦王鼓瑟也相如以死爭之
可也而無一言諫止徒欲以口舌挑強秦之怒假使
秦先殺相如趙王得不危乎假使相如濺血於五步

與秦王俱死趙王亦豈有獨全之理乎以臣觀之相如之不忠甚矣鄭羽良曰藺相如之勸王入秦不能諫鼓瑟誠非忠臣之用心矣然以一言而使秦君臣懼伏不敢動亦可謂有衛主之功矣臣曰此不過匹夫之勇無足取也其得無事亦僥倖矣戰國時所謂名臣蓋多此類雖有目前之功終不可掩其大罪也林錫憲曰以夾谷澠池兩會比而觀之則聖人作用之出尋常大可見矣臣曰聖人功用非可責之於人而澠池之會如有粗聞孔子之道者一人在趙王左右則趙王必不蒙鼓瑟之辱矣講訖臣曰帝王家

讀史之法異乎匹庶非徒多記前史而已善者以為
法惡者以為戒乃是要訣願 邱下每於人君善惡
之際 留意猛省焉讀史至亡國之君自然警惕監
戒為易而最是繼世之君惡德甚多而幸不亡國者
監戒為難若以為彼之惡德如此而猶不亡國雖為
惡不至於亡國則庸何傷乎云爾則此正所以亡國
也彼之不亡特幸耳臣則以為夏之亡不亡於桀而
已亡於孔甲殷之亡不亡於紂而已亡於武乙國之
當亡不亡之際正如病人之將死不死其為哀痛當
如何哉臣之所望於 邱下者即古之堯舜而堯舜

君臣之相與戒飭不過以治國為法以亡國為戒而已讀史之法不外於是願 邸下留意焉 世子曰唯

二十四日 召對 世子曰余左類有掣氣作聲則牽疼恐難講誦矣鄭羽良曰臣等不勝驚慮掣氣牽疼則有妨於講讀今日則只令講官進讀新受音何如臣曰新受音臣當進讀而前受音雖不能作聲講誦其中文義之疑難處拈出下問如何 世子曰別無可疑處矣臣曰自前講論之事每詳於新受音而前受音則 邸下一誦之後更無疑問之事文義之

透徹與否臣等何以知之耶此甚悶鬱矣仍進讀秦
行反間於趙一段臣曰趙括之不可為將在家則其
父母皆知之在國則藺相如等已知之在敵國則秦
人亦知之故至用反間欲括為將矣獨其君不知蓋
反間之說先入而聰明為所蔽故耳其蔽之者想不
過一二人而卒使四十萬生靈駢首屠戮於長平而
莫之救讒人之禍豈不慘哉人主聰明一有所壅蔽
而使無辜之民流血千里敗亡之機如響而至此人
君所當監戒處也然監戒之道亦難必也素明於事
理左右讒佞之說無自而入然後聰明無壅蔽之患

矣 世子曰唯臣曰以綱目觀之讒殺李牧者亦郭
開也小人之禍人國家自古如此廉頗李牧趙之良
將至今歷數古來名將必稱廉李而此兩人并生一
國向使趙君委任而責功則秦雖強大何足畏哉特
以一讒臣在王左右百端讒誣趙王之思用廉頗是
一段好機會而郭開以一言間之使不得名用李牧
之大功垂成而郭開受秦國之金誣以將反竟致誅
死于城既廢國隨以亡甚矣小人之不可使在君側
也蓋小人之心異於恒人苟有毫髮之利於其身雖
主危國亡亦非所恤臣讀史至此每不勝痛惋也

世子曰唯臣曰頃者賓客願 卽下為堯舜此言好
矣其時 卽下若下問以何如可以為堯舜則臣等
當繼有所陳而 卽下之問不及此遂使此言為一
場空言甚可惜也堯舜之道雖似高遠難到而若得
其入道之本循序漸進則堯舜亦人耳有何不可學
之事耶孔子贊舜之德不過曰好察邇言不耻下問
言不必高遠雖淺近之言莫不有至理存焉故舜好
察邇言聖人智周萬物而常若有不足故舜不耻下
問焉非德量宏大廓然大公無一毫有我之私不能
也此堯舜作聖之本也 卽下聰明岐嶷可謂有堯

舜之資稟矣德性成就豈在輔導之如何而如臣者
學術空疎不足以顧問言辭樸訥不足以察納臣竊
愧焉然其他宮僚及賓客豈皆如臣乎嘉言格論之
陳於前者罔非可聞而臣竊覲 邸下聽言之際未
知其留意審察也凡人言語有巧拙長短淺深大小
之不同而究其旨意則莫不有段落歸趣不可不審
聽而裁擇之也 邸下既未嘗逐轉審聽緊謂彼之
所陳不過緣文演義因事陳戒之語而待其語終只
以一唯字應之如此雖使程朱日侍左右庸何益乎
且讀書豈能無疑有疑而不問常置之鵲突之中則

學問何由而進乎凡有疑處或付籤於卷頭或割錄於小紙待臣等入侍之時一一下詢不辨則不措然後方有讀書之效而卽下則一未嘗如此講臣或請俯詢則往往以無疑答之臣未敢信其真無疑也若真無疑則是卽下於書只信口讀過未嘗留意於文義故不知可疑之處初非無疑也豈不悶乎若是而無改則雖日三開筵只為文具而止耳有何所益哉伏願卽下自今加勉必以好察邇言不耻下問八字為用力體行之資毋少忽焉是臣等至望也世子曰當如是矣賓客曰講官所達極為

懇至矣 邸下宜留心體行焉 世子曰何如可以
不信讒臣曰人君明於理則讒不入然明理之道在
格物致知所謂格致之工不外於讀書願 邸下每
讀書必審察前代賢君之何以為賢君昏君之何以
為昏君賢君之時其臣何如昏君之時其臣何如
皆致知明理之術且 邸下方燕居時內臣宮妾必
有言於 邸下曰 邸下今日何不讀書何不引接
講官乎 邸下聞其言而說之則此為堯舜之本又
必有言於 邸下連日讀書勞苦何不暫為休息遊
戲為樂乎 邸下聞其言而說之則此為桀紂之本

何則聞正言而能說之則正言日入於耳聞邪言而說之則邪說日入於耳邪說日入於耳而不知其為邪說此桀紂之所以亡國也 世子曰唯臣曰 卹下雖以冲年自處而一言一動實為一國臣民之所欣戚臣等每自 講筵退出老少知舊必來問 卹下講論何說勤怠如何臣等從實備說文義果有好處臨筵又無怠色云爾則莫不欣欣慶喜若云文義無下詢又有厭倦之意云爾則舉皆憂歎不已蓋愛戴期望之切故人情自不得不如此 卹下亦安可不體其意乎今日 卹下答臣等達辭有逐日開講

之語臣等將出而播告使外間皆知 邸下自今勤學之盛意矣

某月某日 上命世子侍坐 名臣及文學閔百祥講自省編至宋孝宗秉燭讀疏一段臣曰孝宗時朱子上疏以修德養民復讎雪耻之道丁寧反復至累千言疏上夜已深孝宗起坐秉燭而讀之此可見孝宗尊賢好諫之盛德也孝宗必欲復讎常置鐵杖於左右手自運之立木馬於殿庭時時乘之作騎射之狀蓋所以習勞也其志豈不遠大乎 上顧謂世子曰昏字何謂也日則有時乎昏而人心何以有昏乎

世子曰以物慾蔽之也臣曰譬如古鏡本體未嘗不明而塵埃蔽之則暗人心未嘗不明而物慾蔽之則昏苟能窮物理而致吾知則其蔽自去其蔽既去而其明自如也 上曰宋帝之不食燒羊可見愛物之仁而燒羊非如異物之難求何至忍飢不食耶 世

子曰非常供故也臣曰帝王治國之術皆有常度正法雖其口腹之養何獨不然燒羊本非常供而夜中求索則有司必每日豫具而待之人君苟於常供之外漸有求索則其流弊將無所不至此明君之所以慎其始也匹夫之有嗜欲其害止於一身人君之有

嗜慾其害必及於物亡國之道多端而不過始於害
物宋帝之不食燒羊亦有見於此耳百祥曰易之時
義二字難言矣臣曰時義云者易之一卦各有六爻
一爻之中又各有所處之時可行之義乾之初爻是
潛龍之時而有勿用之義二爻是見龍之時而有在
田之義其餘四爻皆然當潛之時不可見當見之時
不可潛此所謂時義也 世子曰唯臣曰孝宗讀朱
子疏秉燭興歎所歎何事也 上曰汝知之乎 世
子曰興歎於其言之善也臣曰聖人智周萬物聲入
心通故雖凡人淺近之言必察其至理之所在舜之

好察邇言是也宋孝宗則不及聖人故必得朱子封
事而後方能好之若衆人之言則未必察也後世庸
君并與聖賢之言而不知好之此至治所以不興也
孝宗能知朱子之賢而悅其言所以為有宋哲辟也
上曰元良見解果何如試拈出一二難解處問之臣
曰所謂欲者皆惡乎欲中亦有善乎上曰此答誠
難矣汝試言之世子曰欲中亦有善乎臣曰有善
今雖不善之人見人為善必欣然慕之所謂民之秉
彝好是懿德者也雖耳目口體之欲能約其情而適
其時則皆善惟不能如此故流而為惡而始害於天

理矣為學之道知此人欲天理之分遏之存之而已
願 邸下省察焉

尊賢閣進對

丁亥正月二十三日承 東宮入對之令與奉 朝
賀朴聖源同至 閣外弼善南玄老兼司書鄭象仁
來言俄者 召對仰稟兩奉 朝賀相見禮貌則
教以當如見賓客之禮矣有客曰雖曾經賓客而致
仕後無此職名何敢當此禮乎聖源以為吾則又未
經賓客曾為諭善時雖以賓客禮見待而今則異於
其時當以君臣之禮處之尤不敢當此禮也鄭象仁

使司謁以此意入稟 答曰曾為賓客諭善今又休

致當以待賓之禮見之矣講官顧謂曰此是 世孫

美意今不可更為煩達遂以次進入 世孫起立與

有容聖源相揖如儀各就席有容曰臣等在外伏聞

睿候多日未寧矣昨今連為 書筵召對今又 召

見臣等可以仰揣其向安矣憂慮之餘喜幸何達未

知快復常節乎 世孫曰自數日來差勝而猶未快

蘇矣有容曰見賓禮臣等有不敢當講官以此意詮

稟而未蒙 許矣雖不敢更為煩瀆不安則極矣聖

源曰臣則又與南有容有異尤為惶悚矣 世孫曰

久不相見心常思之今又休退益為悵然矣有容曰
臣嘗於書筵敢以進德八歲奉獻矣時或賜覽
乎世孫曰置之坐傍常常覽之矣有容曰臣為輔
養官時嘗承聖教講筵文義外欲令知列聖傳
授心法為教矣蓋列聖心法具在於謨訓中八歲
以敬祖訓為首者其意如此且伏念自古有國家
者莫不以輔導儲嗣為先務而至我朝先正臣趙
光祖之於仁宗先正臣宋浚言之於肅廟其輔
導之功於斯為盛真足為今日法而上下相接不出
一誠字矣邸下講筵之餘時取寶鑑及經筵故

事等冊 留心閱覽則必多警省處矣 世孫曰當

體念矣聖源曰 大朝以臣等有輔導 邸下之功

每加褒賞臣於惶愧之中又有所懼者 邸下學業

勤篤大有成就則臣等雖實無輔導之功而謂之有

輔導之功誠為榮幸 邸下若於學業無日月將就

之益則設令臣等曾有輔導之名而畢竟無效虛被

聖獎豈非大可懼者乎惟願 邸下益加勤篤日新

又新以實 大朝褒賞臣等之言焉有容曰其言誠

好矣 邸下苟能深省其言而篤實用工德性日益

成就則 大朝以輔導之功褒獎臣等者有實效而

臣等之承此教亦不歸虛矣豈不美乎聖源曰小學之書古今有異今之小學不但為幼時所講習而已修齊治平之道皆在其中故朱子云如從八九十歲覺悟便從八九十歲立定脚跟而我東儒賢亦有白首稱小學童子者況我邸下方在冲年其於小學豈可以已讀而少忽於溫習乎臣以兼看小學之意曾已仰勉邸下果何以為之耶世孫曰常常披閱矣有容曰今日以後臣等之頻賜入對何可望乎如有經義可詢者俯詢何如聖源曰南有容在京似有入見之時而臣則遠在鄉里登對尤難今

於入見之時如有欲 下詢者下詢焉 世孫曰四

書三經中大旨得聞則欲於讀時以此意讀之耳聖
源曰經傳要義無窮而今欲以一兩字言其大指則
大學言敬中庸言誠斯二字各該括一篇之義論語
所言皆求仁之方蓋仁者天地生物之心而人得之
以為心此所以仁為四德之首人而不仁則生理遏
絕故人之所以為人者唯是仁學者之所以為學者
亦求其不失乎此而已是以孔門諸子多問仁而夫
子各隨其氣質高下所答不同然其指示為仁之方
則一也他皆類此故求仁二字實為論語一書之大

指孟子則言仁必并言義又以利對言義利之間剖
析明白自首章以下皆然此所以遏人慾而存天理
為七篇之大指也詩有善惡而感發懲創得其性情
之正故孔子謂思無邪一言足以盡蓋三百篇之義
書則二帝三王心學之原治道之要皆具於是而堯
典欽明之欽為開卷第一義以下言敬者甚多而這
一欽字實為五十篇之統會至於易則一時字為其
大指此皆有先儒所論矣有容曰仁字之義至大而不
過體上天生物之心而已人之性即天之性故以
惻隱之心為仁之端如折一草一木而非其時則天

之生物之心由我而斷絕不續豈不可畏乎一草木
尚然況於人乎仁字之義蓋通上下而言而為君上
者尤不可須臾忘也又曰學問之工貴先立志必也
使其志堅定不遷然後乃可責學問之工也 邱下
非不志於學也或於燕閒得肆之地不能如 講筵
對賓僚之時則是好學之志未免為外物所遷而間
斷不接續也詩稱文王之學曰於緝熙敬止蓋謂繼
續而光明之無時間斷也臣敢以緝熙二字為 邱
下獻焉臣雖退處田里如聞 邱下頻御書筵親近
講臣 睿德日新令聞日彰云則其喜樂之心將如

何耶若或所聞反乎是則其憂悶之心亦將如何耶
此心非臣等獨然實億兆之所同然 邱下其可不
深省而下察之乎 世孫曰當體念矣聖源曰聖學
之要莫如敬蓋心為一身之主宰而敬又一心之主
宰也非敬則無以檢攝身心願於敬字上加意也

世孫曰敬何以用工耶聖源曰程門言敬者朱子於
大學或問列之而又詳於敬齋箴取而覽之則可知
其用工之方矣大抵敬者主一無適之謂主一者心
主乎一無適者心不他適也 邱下於讀書時則心
主乎讀書一事應接賓僚則心主乎應接一事推類

而事事皆然則是乃敬也然心是活物無形體之可
以模捉故操心之方必自外面而著工敬齋箴以正
其衣冠尊其瞻視為首程子曰只整齋嚴肅則心便
一一則自無非僻之于弟子職亦云顏色整齊中心
必式願以此數語加工焉有容曰詩曰抑抑威儀維
德之隅蓋觀其外可以知其內故威儀不可不慎然
非成德君子鮮能表裏如一臣之所竊憂者或恐威
儀過於修飾辭令過於簡默此在朝廷朝會可也施
之講筵不能無妨蓋上下相接嚴畏之心勝則情
地或有所不通講論或有所未詳故也臣謂畧其虛

文降其辭色侃侃和悅自然情地相孚然後講學方有實效矣聖源曰接賓僚之道不可徒尚淵默而至於容貌威儀之間整齊修飾則豈不好乎有容曰禍人家國者不一其種而柔佞之人為尤甚蓋陰柔之性巧佞之言善伺人指意而逢迎之善候人辭色而承順之可悅而無忤易狎而難遠心性常為其所壞志氣常為其所屈浸潤既久遂以為可信可親而正直之士忠謹之言日見疎而不能入矣大抵居崇高之位處芬華之地有求於上者衆則彼諂諛者之投間乘隙蠱惑上心千百其端苟非學問素明心志素

定外誘不能以入則鮮不受其敗古今已然之跡可見矣臣非謂目前必有如此之憂第願深留睿思常以此為至戒也聖源曰國之興亡專由於人君之好善惡惡然人之善惡賢邪知之亦難必須講學窮理心目俱明然後可知也夫聽言察人不在於大雖於至近至細之事亦可以觀臣於頃年邸下會講之日臣仰陳於大朝曰今日臣等忝在世孫勸講之列豈有獻謠者而然而課講之際設令一講官請以十行一講官以為十行太多一講官請以百讀一講官以為百讀太多則從多從少之間易有厭聞樂

聞之異此雖微事而習以為常則至於忠直逆耳之言輒患不入而阿諛順志之言易為喜悅其漸不可長也大朝以為是邸下今雖未操取舍黜陟之柄而凡於臣僚下別其賢邪佞直則不可不明也世孫曰今日所講論皆切實可不深體焉有容曰所欲仰達不止於此而日氣稍寒坐堂良久恐妨調攝敢請退出矣世孫曰將饋茶可出外少留也遂退出

雷淵集卷之二十八

